

**ԶԱՐԻ ԵՎ ԲԱՐՈՒ, ՍԻՐՈՒ ԵՎ ԱՆՉԱՍՁՈՅՈՒԹՅԱՆ
ՓՈԽՅԱՐԱՐԵՐՈՒԹՅԱՆ ԽՆԴԻՐԸ
ԱՎ. ԻՍԱՀԱԿՅԱՆԻ ԱՐՉԱԿ ՊՈԵՄՆԵՐՈՒՄ ՈՒ ԼԵ-
ԳԵՆՂՆԵՐՈՒՄ**

«Ուտքերը հողի մեջ էին, ճակատը երկինքուտ էր, կուրծքը բաց էր հողմերի ու հովերի առաջ... Ամենքինն ու ամենինն էր նա, եզակիորեն ինքը, իր անկողնապետի ու անսպառ ինքնությանը, ինքն իր մեջ, ինքն իր հետ: Բաշխվում էր ու չէր սպառվում», - Գ. Սահյանի շիտակ բնութագրմամբ՝ այսպիսին է Ավ. Իսահակյանը:

Ճշմարիտ որ անսպառ է նա. ինչքան էլ զանծեր է շռայլել ծով դարանից իր հոգու, դարծյալ չի սպառվել:

Զարի և Բարու, Սիրո և Անձնագոհության փոխհարաբերության խնդիրն Իսահակյանը քննել է «Զինգիգ-խանը» (1907), «Շի-Յոանգ-Տի Բողդիխանը» (1907), «Ազավոր արագիլը» (1912), «Մի սոխակի մահը» (1913), «Ուշինարա» (1923), «Բուղդիան թռչուն» (1925) ստեղծագործություններում:

Մարդկային հոգու մեջ բարի և չար նախահիմքերի հարաբերակցության բացահայտումը 20-րդ դարի գիտության և արվեստի հիմնախնդիրներից մեկն էր, որից չէր կարող անմասն մնալ Ավ. Իսահակյանը: Այս խնդրի նկատմամբ հետաքրքրությունը պայմանավորված էր թե՛ համաշխարհային քաղաքական իրադրությամբ (հեղափոխություններ, համաշխարհային պատերազմ) և թե՛ ազգային ճակատագրով (չարունակական բռնություններ, 1915թ. Մեծ եղեռն):

Հոգեվերլուծական փիլիսոփայության մեջ տարբերակվում է բռնության կամ ագրեսիվության երեք ձև՝ բարորակ, պաշտպանողական և չարորակ ագրեսիա¹: Զարորակ ագրեսիան հատուկ է միայն մարդուն, քանի որ միայն մարդն է, որ ընդունակ է տանջել, սպանել իր նմաններին և դրանից բավականություն ստանալ: Զարորակ ագրեսիայի դրսևորումներից է Դաժանությունը (կամ՝ Դեստրուկտիվությունը), որի գլխավոր ենթատեսակը սադիզմն է: Ըստ Ջիզմունդ Ֆրոյդի՝ սադիզմը էրոսի (կյանքի բնագո) ու Թանատոսի (մահվան բնագո) խառնուրդն է և ունի էքստրավերտ (դեպի դուրս) ուղղվածություն: Սադիզմի հիմքը, ըստ Էրիխ Ֆրոմի, կենդանի էակների վրա բացարձակ և անսահմանափակ իշխանության կիրքն է կամ ծարավը: Սադիզմն առաջ է գալիս անկարողու-

¹ Տե՛ս Յու. Դովականյան, Հոգեվերլուծական փիլիսոփայություն, Եր., 2001, էջ 124:

նակության զգացումից: Անհատը, անկարող զգալով կյանքի նկատմամբ, ձգտում է փոխհատուցել իր այդ թերությունը մարդկանց վրա ձեռք բերած հսկայական իշխանությամբ: Սադիստը չի բավարարվում իր ունեցած իշխանությամբ. նա անընդհատ ձգտում է ավելիին: Բայց, դրամով հանդերձ, նա դժբախտ, միայնակ ու սարսափներով լի արարած է:

Ավ. Իսահակյանի «Զինգիգ-խանը» լեգենդում բռնակալությունն երևոյթը բացահայտվում է կերպարի բռնակալական խառնվածքով թելադրվող վարքագծի դրսևորման միջոցով:

Իսահակյանը լեգենդը կառուցել է բռնակալի կեցվածքի թվացյալ զորեղության և բնության օրենքի կայուն հզորության հակադրության կարգով. «Հզոր է Զինգիգ-խանը. նա կարող է հրամայել մի վայրկյանում խալիֆաների Բաղդադը Տիգրիսի փոփաբաշ ալիքների տակ ծածկել, Արաբստանի անապատների ծովածածան ավազը մինչև արևի ակը բարձրացնել. նրա հրամանով կարող են ֆրանկների աշխարհը հողի տակ թաղել... Սակայն նա անզոր է մի նժույգի սանձահարել»²:

Լեգենդում թե՛ «մատաղ եղնիկների բույլեր-չքնաղ, մարմարիքան աղբիկները», թե՛ «արևի աշխարհներից բերված և արևի խանդավառ երազներով արբեցնող հարյուր տարվա հրաբորբոջ գինին» և թե՛ «հրեղեն կրծքով Զինու հագարամյա պարիսպները խորտակած և հզոր սմբակներով էլբրուսի պողպատե կողերից ժայռեր պոկած մրկածին նժույգը» կյանքի խորհրդանշներն են: Կյանքը թռչնակի պես թալոտում էր խանի հզոր բռունցքի մեջ, քանի դեռ ժամանակը կամաց-կամաց նրա հզոր բռունցքը չէր թուլացրել և նրա բացված ափից անդարձ թոցրել կյանքի թռչնակին:

«Իմ թագավորությունը չարժե երիտասարդ հովիվի կրակե մի համբույրին», - մոլեգնած բացականչում է խանը, որ, - գրում է Գ. Հովհաննիսյանը, - իսահակյանական ենթատեքստում հնչում է որպես ապրելու, վայելելու ժողովրդի մարդկանց առօրեական կյանքի պաշտամունք «սույն այս հզորների» փառասիրական մարմաջի, զորեղության մոլուցքի կողքին: Մարդն է արթնանում Զինգիգի մեջ, արթնանում է, սակայն ողբերգականորեն ուշ»³:

Զենք կարող համաձայնել Գ. Հովհաննիսյանի հետ, որը, Զինգիգի՝ անկարողունակության զգացումից ծնված «Իմ թագավորությունը չարժե երիտա-

² Ավ. Իսահակյան, ԵԺ, 6 հատորով, հ. 3, եր., 1975, էջ 132 (Իսահակյանի վեցհատորյակից բերված մյուս մեթերումների հղումները կտրվեն տեղում՝ փակագծի մեջ, կնշվեն միայն հատորը և էջը):

³ Գ. Հովհաննիսյան, Ավետիք Իսահակյանի արձակ, եր., 1963, էջ 159-160:

սարդ հովիվի կրակե մի համբույրին» միտքը հիմք ընդունելով, եզրակացնում է, թե մարդն է արթնանում Չինգիզի մեջ: Ընդունենք, որ խանի գլխում հանկարծակի ծագած այդ միտքը հավերժին ու անեզրին տիրանալու մարդկային ձգտումն է արտահայտում, բայց հարց է առաջանում՝ ինչպիսի՞ վարքագիծ դրսևորեց «նրա մեջ արթնացած մարդը»:

«-Վեզի'ր, հրամայում եմ իմ պետության բոլոր աղբյուրներն ու գետերը, ծովերն ու օվկիանոսները թունավորեցեք, որ ինձ հետ մեռնեն ամենքը, ամենքը...» (հ. 3, էջ 134):

Չինգիզի վերջին ցանկությունը՝ իր հետ ամենքին մեռցնելու ձգտումը, բացարձակ էզոիզմի (ինդիվիդուալիստական փիլիսոփայության գլխավոր դրույթներից մեկը) արտահայտություն է: Խանը իր սեփականությունն է համարել ոչ միայն իր, այլև իր տիրապետության տակ գտնվող ամենքի կյանքը:

«Մարդ չպիտի մտածի աշխարհից բան տանելու մասին, այլ աշխարհում բան թողնելու մասին»⁴.- սա իսահակյանական մարդու բարոյական նկարագիրն է: Չինգիզ խանը՝ աշխարհում բան չթողնելու իր փափագով, այս նկարագրի մեջ դժվար թե տեղավորվի:

Ի տարբերություն Չինգիզ-խանի, որը ձգտում էր իր տիրապետությունը հաստատել ոչ միայն կյանքի, այլև մահվան վրա, Շի-Յոանգ-Տի Բողդիխանը ձգտում է տիրել Ոգուն ու Մտքին:

«Չին կայսր Շի-Յոանգ-Տի Բողդիխանը, չհագեցնալով աշխարհակալ իշխանությամբ, ձգտում է իրեն ստրկացնել մարդկային միտքը, նրա ստեղծարար ուժն ու նվաճումները: Նրան հարկավոր էր մարդկային հոգևոր մտքի ստույգ և հաստատ ստրկացում»⁵.- գրում է Ավիկ Իսահակյանը՝ Բողդիխանի իմացության ձգտումը ևս բռնակալական մղում համարելով:

Շի-Յոանգ-Տի Բողդիխանի ձգտումը՝ իմանալու, թե ինչ է նյութը, պատճառն ու հետևանքը, ժամանակն ու տարածությունը, երբ է տիեզերքի սկիզբն ու վախճանը, որն է մարդու գոյության իմաստը և այլն, այդուամենայնիվ, տոսկ բռնակալական մղում չէ, այլև իմացության ծարավ: Բողդիխանը ձգտում է դեպի տիեզերական միտքը, տանջվում Տիեզերք-Աֆիքսի մեծությունից: Իսահակյանի մշակած կերպարը տվյալ դեպքում պարզ ու միագիծ բռնակալ չէ, այլ բարդ ու հարուստ ինքնություն:

«Ինչ է և ինչու է»-ին չտիրապետելու, դրանց ոչ հասու լինելու գիտակցությունն է մղում Բողդիխանին ոչնչացնելու ինչպես աստղադիտարանն ու մա-

⁴ Ավ. Իսահակյան, Ծանոթ և անծանոթ էջեր, եր., 1988, էջ 315:

⁵ Ա. Իսահակյան, Ավետիք Իսահակյանի արձակը, եր., 1975, էջ 56, 57:

տյան-մագաղաթները, այնպես էլ իր առջև լուսուսի տերևների պես դողացող չորս հարյուր հիսուն իմաստուն այրերին:

Հետաքրքիր է, որ Բողոքիխանի տիրապետման ծագումը ժամանակի երեք չափումների վրա էլ տարածվում է՝ անցյալի, որի մեջ մտնում էին իր մոխրացրած մատյաններն ու մագաղաթները, ներկայի, որն ընդգրկում էր գործող իմաստուններին ու գիտուններին, որոնց ևս ոչնչացրեց, և վերջապես՝ ապագայի, որն ուրվագծվում է իր կազմած հրովարտակի մեջ.

«- Հրովարտակեցեք մեր պարիսպներից մինչև դարբասները երկնածորար Հիմալայի և մինչև ափերը մեծ օվկիանոսի, որ այսուհետև (ընդգծ՝. Հ. Վ.) երկնային պետության սահմաններում չափտի գրվի ոչ մի գիրք «Ի՞նչի և ինչու՞ի» մասին, չափտի խորհվի կյանքի նպատակի մասին, չափտի հարցվի պատճառների պատճառի մասին, իրերի սկզբի և վախճանի մասին, չափտի քննվեն տիեզերական գաղտնիքները, և մանավանդ ոչ մի շշուկ ժամանակի-տարածության առեղծվածի մասին: Երբե՛ք, երբեք» (հ. 3, էջ 127):

Իսկ այն հարցի, թե ինչու Բողոքիխանն ինքնասպան եղավ, դաշույնը սեփական ձեռքով իր սիրտը խրեց, պատասխանը հենց տեքստի մեջ է. «...Եհ-Հոանգ-Տի Բողոքիխանը սպանեց Ոգին ու Միտքը, որովհետև Ոգին մղում է դեպի անհուսություն, Միտքը՝ դեպի մահ» (հ. 3, էջ 127): Այսինքն՝ Բողոքիխանը իրենից դուրս փորձեց սպանել Ոգին ու Միտքը, բայց չէ՞ որ Ոգին ու Միտքը ինչ-որ ձևով նաև ի՛ր մեջ էին, ուստի չէր կարող սպանել Ոգին ու Միտքը՝ առանց ինքն իրեն սպանելու:

Սիրո մասին Իսահակյանի այն բանաձևումը, թե՝ «Սերը, իսկական սերը արտահայտվում է միայն զոհաբերության մեջ»⁶, գեղարվեստորեն արտահայտվել է «Ազավոր արագիլը», «Մի սոխակի մահը» արձակ պոեմներում և «Ուշիմարա», «Բուդդիան թռչուն» լեգենդներում:

Գեղագետի խորաթափանց հայացքով թռչունների վարքագծի մեջ Ավ. Իսահակյանը անձնվեր սիրո երևույթն է որսացել («Ազավոր արագիլը», «Մի սոխակի մահը»):

Անձնվեր սերն առաջին հերթին նշանակում է տալ և ոչ թե վերցնել: Տալը, ինքնանվիրումը, անձնազոհությունը այդպիսի սիրո դեպքում ինքնանվիրվողի վեհության, հզորության, հոգևոր հարստության մեծագույն առիավատչյան են:

Որսորդների անգութ ձեռքով մայր-արագիլը զարկվեց, իսկ հայր-արագիլը՝ «Տեսնելու բան էր, թե ինչպես խեղճը թևակոտոր ընկավ կնոջ դիակի վրա, լալագին ծայրով լակ-լակ արեց. վեր ու վար թռավ, թևերով երբեմն իր գլխին էր

⁶ Ավ. Իսահակյան, Ծանոթ և անծանոթ էջեր, Եր., 1988, էջ 302:

խփում, երբեմն՝ չոր գետնին... Մութը որ իջավ՝ թևերը քարշ տալով հասավ բույնը, որը ծագերին ծվարեց թևերի տակ և լռեց: ... Առավոտ վաղ թռչում էր բույնին մոտիկ դաշտերը, գետափերը, աչքը միշտ պահելով բույնի վրա. պարեն էր հավաքում, բերում ծագերին տալիս» (հ. 3, էջ 52):

Հայր արագիլի վարքագծի մեջ հատկանշականը նրա անկոտրում կամքն է, որով նա հաղթահարեց բոլոր խոչընդոտները և մինչև վերջ անդդվելի մնաց իր անձնավիրության մեջ.

«Ամեն օր գնում էր նա այնտեղ (կնոջ զարկված տեղը-Հ. Վ.), մի ոտքի վրա ժամերով տխուր կանգնում՝ վիզը ծռած, գլուխը թևերի տակ: ...Այսպես երեք թե չորս տարի ապրեց նա սզվոր, ապրեց մեռակ ու կատարյալ այրի» (հ. 3, էջ 52, 53):

Անձնագոհ հոգու է՛լ ավելի հուզիչ ու նրբին ծալքեր է բացում Ավ. Իսահակյանը «Մի սոխակի մահը» արձակ պոեմում սիրո համար կյանքը տված թռչնակ-երգչի միջոցով:

Սիրավառ սրտի, հրեղեն արցունքների և անծայր կարոտի մի դյուբական հեքիաթ սփռելով շուրջը՝ նռնենու ճյուղերի միջից երգեց սիրառատ սոխակը, երգեց մեղմ ու սուր հնչյուններով, սիրո բյուրաբյուր նրբերանգներով: Բոլորանվեր տրվելով, իրեն ոչ մի հուր չթողնելով՝ երգեց սոխակը սիրո երգը՝ այդ երգի մեջ էլ իր մահը գտնելով:

«...Լորից սկսեց երգել սոխակը, հաղթական երգիչը. և այս անգամ ավելի հզոր, և ավելի բարձր՝ ամբողջ հուր ու բոց, ամբողջ խանդ ու ոգի. ամեն մի հնչյունի մեջ՝ իր սրտից մի կտոր:

Անհուն երջանկության և պայծառ ուրախության բոցեղեն գինու մի շատրվան էր նրա երգը, որ կայլակում էր շողշողալով դեպի վերև, դեպի վերև...»

Եվ հանկարծ, ասես սրի մի հարվածով երգը կտրվեց, և երգիչը գլխիվայր ընկավ նռնենու տակ» (հ. 3, էջ 55):

Եթե «Ազավոր արագիլը» ու «Մի սոխակի մահը» արձակ պոեմներում անձնագոհությունն իրագործվում էր զուտ համուս սիրո, ապա «Ուշիմարա» և «Բուդդիան թռչուն» լեգենդների մեջ զոհաբերության հիմքում ընկած է բարոյական պարտքի գիտակցությունը:

Մի կողմից՝ բնական, մյուս կողմից՝ բանական էակ է մարդը: Բնության օրենքները գոյություն ունեն պատրաստի վիճակում՝ անկախ մարդուց: Մինչդեռ բարոյական օրենքները մարդը՝ որպես բանական էակ, ինքն է ստեղծում:

Մարդը, ըստ Հեգելի, պիտի «բանականի բավարարումը սահմանափակի ոչ միայն անհրաժեշտության շրջանակներում, այլ ունակ լինի այն զոհաբերել ավելի վեհ պարտքի»⁷:

Բնության մեջ գործում է անհրաժեշտությունը, իսկ բարոյական կյանքում՝ պիտոյությունը: Այլ խոսքով՝ բարոյական օրենքի իրագործումը մարդու սուբյեկտիվ կամքով է պայմանավորված: Բարոյական օրենքների գլխավոր բաղադրիչը պարտք հասկացողությունն է, իսկ բարոյական պարտքի բնորոշ հատկանիշը՝ անձնագոհությունը: Վերջինս հասարակության մեջ ճշմարիտը, Բարին, Գեղեցիկը հաստատելու զորեղ միջոց է:

«Դարվիմի տեսությունը կենդանական աշխարհին է վերաբերում և այդ առումով էլ ճշմարիտ տեսություն է, բայց մարդը իրավունք չունի այդպես դատելու, նա պարտավոր է թույլեթիմ պաշտպանել»,⁸ - բնության օրենքները հասարակության վրա չտարածելու նկատառումով այսպես է արտահայտվում Ավ. Իսահակյանը:

Իր հիմքում ունենալով հանուն բարոյական պարտքի՝ անձնագոհության գաղափարը՝ «Ռէշինարա» լեգենդը զարգանում է բնական և բարոյական օրենքների բախման սկզբունքով: Ռէշինարան բարոյական օրենքների կրողն ու գործադրողն է, իսկ աղավմուն հետապնդող անգղը՝ բնության օրենքների:

«-Դատավոր,- դիմեց անգղը Ռէշինարային,- քաղցը վաղուց ընկճել է ինձ: Սեծ հանցանք է քաղցածի ձեռից խլել նրա սնունդը: Ե՛տ տուր ինձ աղավմին: ...Դու պարտաճանաչ մարդու հռչակ ունես, սակայն ինչու՞ պարտքի օրենքին հակառակ ես գնում: Ինչու՞ ես ինձ զրկում իմ անհրաժեշտ սնունդից:

- Այս անօգնական, մահի սարսուռով դողդոջուն թռչունը իմ պաշտպանությանը դիմեց, - առարկեց Ռէշինարան,- դու՛, հզոր անգղ, մի՞թե չես տեսնում, որ իմ առաջին պարտքն է-չհանձնել ինձ հավատացող արարածին իր հոշոտող թշնամուն» (հ. 3, էջ 218, 219):

Կշեռքի բարոյականության նժարը, ի վերջո, ծանր կշեռեց բնության օրենքի նժարից՝ Ռէշինարայի անմնացորդ գոհողության գնով:

«Բուդդիան թռչուն» լեգենդում անձնագոհության հիմքը տառապյալ մարդու հանդեպ Բուդդիայի մեծ կարեկցությունն ու սերն է, իսկ նպատակը՝ ապրելու կամեցողությամբ տառապող մարդու փրկությունը:

«-Կամենալ ապրել,- խոսեց նա յուրովի,- ահա՛ չարիքի հավերժական արգանդը, որ բնավ չի ստեղծանում:

⁷ Տե՛ս Գ.Վ.Ֆ. Հեգել, Փիլիսոփայության ներածություն, Եր., 1964, էջ 109:

⁸ Աղավմի, Նրա մտեքմական աշխարհում, Եր., 1975, էջ 34:

Եվ ամենքը կամենում են ապրել, և յուրաքանչյուրը կամենում է ապրել-
մարդը երկրի վրա, և որդը տիղմի մեջ և հունտը հողի տակ» (հ. 3, էջ 222-223):

Թռչունի կերպարամբ առած Բուդդիան իր անձնագոհ արարքով, որը բա-
րոյական վարքագծի դրսևորում է, նպաստեց բնության օրենքի անհրաժեշտ
գործունեությամբ, բացասելով հաստատեց ապրել կամենալու անպարտելի
անհրաժեշտությունը.

«Ո՛վ ապրելու դառն անհրաժեշտություն,- խոսեց նա իր սրտի մեջ: Ան-
հուն է ձեր տառապանքը, ո՛վ ապրողներ. անսկիզբ և անվախճան ժամանակի
մեջ եկող ու գնացող և վերստին եկող, ո՛վ անհամար թշվառներ:

Անհու՛ն է ապրել կամեցողի տառապանքը:

Բայց թո՛ղ ապրի այս մանուկը... օ՛մ, օ՛մ, օ՛մ... :

Այս ասաց թռչունը և իրեն նետեց խարույկի մեջ» (հ. 3, էջ 223):

Բարոյակրթող հզոր լիցքերով օժտված գաղափարաբանությամբ
հանդերձ՝ Ավ. Իսահակյանի արծակ պոեմներն ու լեզենդները գեղարվեստի
մնայուն արժեքներ են՝ ձևի և բովանդակության ներդաշնակ համադրությամբ:

Որպես գրական ժանր՝ արծակ բանաստեղծությունը (կամ՝ պոեմը) մի-
ջանկյալ դիրք է գրավում իր բովանդակությամբ պատմվածքի ու քնարական
բանաստեղծության, իսկ ձևով՝ արծակի ու ռիթմիկ չափածոյի միջև: Ըստ այդմ՝
այն հեղինակին թույլ է տալիս առավել անկաշկանդ կերպով արտահայտել իր
զգացմունքային վերաբերմունքը, հույզերն ու ապրումները՝ չենթարկվելով չա-
փածոյի ձևական կանոններին: Արծակ պոեմը հենց այն ժանրն է, որն անհրա-
ժեշտ էր «զգացմունքի տարերային անմիջականությամբ» (տերյանական հան-
ճարե՛ղ բնորոշում) օժտված ստեղծագործողին՝ Իսահակյանին՝ «իրեն տանջող
մտքերին ու զգացմունքներին ելք որոնելու, ներքին ճնշումից, հոգեկան բեռից
ազատվելու»⁹ համար:

Նմանապես և լեզենդի ժանրը, որի գեղարվեստական տիրույթում իրա-
գործվում են աշխարհում նյութապես անիրագործելի մարդկային տենչանքներն
ու ձգտումները. «Լեզենդները, առասպելները,-բնութագրում է Ավ. Իսահակյա-
նը,- ցանկությունների արդյունք են: Մարդկային տեսիլները, ձգտումները ա-
ռասպելների, լեզենդների մեջ գտնում են իրականացում, բովանդակություն,
վարձատրություն: Այն, ինչ չի կարելի աշխարհում նյութապես իրականացնել,
իր կենսագործումը, ուրեմն, գտնում է երազների, տեսիլների, լեզենդների, ա-

⁹ Դ. Դեմիրճյան, Եժ, հ. 8, եր., 1963, էջ 199:

ռասպելների, պոեզիայի մեջ: Դրանով, դրանց միջոցով տենչացող հոգին հանգստանում է ու բավարարվում»¹⁰:

Իրենց խորքով ու խտությամբ Իսահակյանի արձակ պոեմներն ու լեզենդները խոհափիլիսոփայական արձակի չխունացող արժեքներ են: Որ ոլորտում էլ դրսևորվի՝ տիեզերքի, թե աշխարհի, կյանքի, թե մահվան, բարու, չարի, թե սիրո, միևնույն է՝ Իսահակյանի խոհը հունցված է լույսից և մարդու հանդեպ բացառիկ սիրուց, այնպիսի սիրուց, որի միջոցով հոգին տիեզերանում, և տիեզերքը հոգիանում է:

Ընդգծելով ժամանակի վճռորոշ դերը գրական- գեղարվեստական երկի պատմագործառնության համակարգում՝ Ավ. Իսահակյանը գրում է. «Ժամանակը, ամեն ինչ ժամանակն է որոշում: Ժամանակը, եթե նրա ազդեցության տակ ես, մոլորեցնում է, բայց հետո հաջորդ ժամանակները ճշտում են արժեքները, մաղից անց են կացնում, և ինչ որ կապված է միայն ժամանակի հետ՝ մաղից անցնում է, որպես իր դերը կատարած, որպես պատմական արժեք միայն, իսկ այն, որ ժամանակի հետ կապված չի նելով, նաև ընդհանրական է՝ մնում է մաղում և շարունակում իր կյանքը նաև հետո, երբեմն շատ երկար, անգամ դարերով»¹¹:

Ավ. Իսահակյանի ստեղծագործության դեպքում գործում է այս վերջին տարբերակը. նրա երկերն անվերապահորեն դասվում են «ժամանակների մաղի» մեջ մնացած այն արժեքների թվին, որոնք անմահ են հանճարեղի համար նախասահմանված հավերժության օրենքով:

¹⁰ «Գրական թերթ», 1960, N 44:

¹¹ Ռ. Զարյան, Ավետիք Իսահակյան, Եր., 1974, էջ 71: